

**LEKSYON 1**

**NAGSUGOD IKAW  
SANG BAG-ONG  
KABUHI**



**Ang Matun-an Mo Sa Sini Nga Leksyon**

**Ano ang Natabo?**

**Ang Bag-ong Kabuhi kay Kristo**

**Ano nga Sari sang Kabuhi?**

**Ano ang Imo Dapat Buhaton?**

**Ang Bag-o Mong Panimalay: Ang Imo  
Amay**

**Ang Bag-o Mong Panimalay: Ang Imo  
Magulang**

**Ang Bag-o Mong Panimalay: Ang  
Balaan nga Espiritu Kabulig Mo**

**Ang Bag-o Mong Panimalay: Ang iban  
nga mga Kristohanon**

**Ano ang Natabo?**

Nagsugod ikaw sang bag-o nga kabuhi sa tion nga imo ginbaton si Kristo Jesus nga imo personal nga Manluluwas. Sia ang Manughatag sang kabuhi – pinasahi, bugana kag malipayon nga wala sing katapusan. Ginhatag nimo ang imo kabuhi sa Iya nga napun-an sang sala kag kapas-lawan. Kag sa baylo sina ginhatagan Niya ikaw sang kabuhi nga madinalag-on sa sala. Nagsugod ikaw sing kabuhi nga napun-an sang mahima-yaon nga kahigayunan subong nga anak sang Dios.

**Buhata Ini**

Pili-a ang husto nga sabat sa mga pamangkot. Butangi sang x ang tupad sang sabat nga imo ginahunahuna nga husto.

1. Sa diin maghalin ang bag-o mo nga kabuhi?

..... a) sa imo pagpanikasug nga magKristohanon.

..... b) kay Jesu-Kristo, ang Manughatag sang kabuhi.

..... k) sa pagpasakup sa Iglesia.

Tabuni ang sabat sa idalum sini nga bahin samtang ginasulat mo ang imo kaugalingon nga sabat.

Sabat: 1. b) kay Jesu-Kristo, ang Manughatag sang kabuhi.

## **Ang Bag-ong Kabuhi kay Kristo**

May bag-o ka nga kabuhi tungod kay si Ginuonng Jesus nagapuyo sa imo. Nagasugid sa imo ang Pulong sang Dios, ang Biblia, nahanungod sini.

■ Si Kristo sa inyo, ang paglaum sang himaya.  
Mga Taga Colosas 1:27.

Ang linya sa wala makabulig sa imo agud matalupangdan mo sing madali ang mga bersikulo. Ang reperensya sa katapusan nagatudlo sa imo kon diin nimo pangitaon sa Biblia.

### **Buhata Ini**

Butangi sang x ang tupad sang husto nga sabat.

2. Sa diin nimo matun-an nga ang kabuhi gikan kay Kristo nagapuyo sa imo?

- ..... a) sa Biblia, ang Pulong sang Dios.
- ..... b) gikan sa Siyensya
- ..... k) sa nagkalainlain nga pagtu-loohan.

Sabat: 2. a) sa Biblia, ang Pulong sang Dios.

**Ano nga Sari sang Kabuhi?**

Si Kristo nga nagakabuhi sa imo, amo ang nag-himo sa imo nga Kristohanon. Ang panghuna-huna sang iban, nga ang Kristohanon nga kabuhi wala sing kalipay kag kaangay sang yara sa bilanggoan. Daku ang ila pagsayop. Kay ang bag-o mo nga kabuhi kay Kristo isa ka bugana kag malipayon nga kabuhi nga wala pa gid nimo maambiti sang una.

**Buhata Ini**

Butangi sang x sa tupad sang husto nga sabat.

3. Sa pagbaton nimo kay Kristo Jesus nga Manluluwas, nagsugod ikaw sa kabuhi nga:

..... a) masinulob-on.

..... b) labing malipayon sang sa daan mo nga kabuhi.

..... k) kaangay sang isa ka binilanggo.

Sabat: 3. b) labing malipayon sang sa daan mo nga kabuhi.

■ Ako nagkari, agud nga may kabuhi sila, kag may kabuganaan sini. Juan 10:10.

### **Buhata Ini**

4. Sauloha ang pulong ni Ginuong Jesus sa Juan 10:10.

Ibutang ang x sa tupad sang husto nga sabat.

5. Nagkari si Ginuong Jesu-Kristo sa paghatag sang

..... a) silot sa imo mga sala.

..... b) kabuhi . . . nga may kabuganaan.

Sabat: 5. b) kabuhi . . . nga may kabuganaan.

Makita nimo sa bag-o nga kabuhi nga ginhatag ni Ginuong Jesus ang bag-ong paghangup, bag-ong palanan-awon, bag-ong lalambuton kag bag-ong tinutuyo sang pagkabuhi.

Nadula ang lulan sang sala kay ginpatawad ikaw. Ang bag-ong gugma sa Dios kag sa iban nga katawhan nagapuno sa imo tagipusoon, nga nagadala sang kalinong kag kalipay. May bag-o na ikaw nga pagdayaw sa tanan nga mga maayo kag maanyag, kag bag-o nga pagbatyag sang presensya, gahum kag kaayo sang Dios. Ang bag-o nga handum sa pagpahamuot sa Dios kag sa pagbulig sa iban nagsugod sa paghatag sang bag-o nga gabayan sa imo mga hulag.

Ang atataro nga nahimo nga alibangbang wala makaagi sang kabalhinan nga gintuga sang Bala-an nga Espiritu sa imo. Indi na ikaw kaangay sang atataro nga nagaguyod sang imo kaugalingon nga kabuhi. Ginbag-o ikaw ni Ginuong Jesu-Kristo kag nangin bag-o nga tinuga. Kaangay ka sang isa ka alibangbang nga nagalupad nga may kahilwayan sa imo espiritu. Karon hilway na sa pag-alagad sa Dios. Natawo ikaw liwat kag indi na isa ka makasasala, kay ikaw karon anak sang Dios.

### Buhata Ini

Butangi sang  $x$  ang tupad sang husto nga sabat.

6. Diin sa sining mga bagay ang imo maangkon sa bag-o mong kabuhi,

..... a) bag-ong palanan-awon

..... b) madamo nga manggad.

..... k) ang pagdayaw sang imo mga abyan.

7. Sang natawo ikaw liwat nagsugod ikaw sang kabuhi nga

..... a) hilway sa mga gumontang.

..... b) napun-an sang paghigugma sa Dios kag sa iban nga katawohan.

..... k) may kahilwayan sa pagbuhat sang imo naluyagan.

Sabat: 6. a) bag-ong palanan-awon

7. b) napun-an sang paghigugma sa Dios kag sa iban nga katawohan.

## **Ano ang Imo Dapat Buhaton?**

Subong sang isa ka lapsag nga bag-o natawo sa panimalay sang Dios, maambitan mo ang mapinalanggaon Niya nga pagtatap. Kinahanglan batunon nimo ang mga pagtatap nga Iya ginahatag agud makaangkon ka sang maayong lawas kag kusog. Ginhatagan Niya ikaw sang bag-o nga kinaiya, kag kinahanglan buhaton nimo ang imo bahin sa pagpatubo sini.

Magabulig ini nga libro sa pagpatubo sang imo bag-o nga kinaiya. Samtang nagatuon ikaw sini nga leksyon, matun-an mo ang mga kahigayunan kag katungdanan subong nga anak sang Dios. Hingaliti ini samtang nagakabuhi pa ikaw diri sa duta. Sa pila ka adlaw pagadalhon ikaw ni Ginuong Jesus sa langitnon Niya nga puloy-an. Kag magpuyo didto kaupod Niya. Isa ini ka puloy-an nga indi matumbasan sang linibo ka mga tumalagsahon nga butang diri sa kalibutan.

### **Buhata Ini**

Butangi sang x ang tupad sang husto nga sabat:

8. Ano ang ginahambalan sini nga libro?

- ..... a) Ang imo pagkabuhi subong katapo sang Iglesia.
- ..... b) Ang bag-o nga kinaiya nga ginhatag sang Dios sa imo.
- ..... k) Mga sugo nga dapat pagsundon sang Kristohanon.

9. Nagatuon ikaw sini nga leksyon agud

- ..... a) makakuha sang sertipiko.
- ..... b) makadebate nahanungod sa relihiyon.
- ..... k) mahimuslan ang mga kahigayunan subong nga anak sang Dios.

Sabat: 8. b) Ang bag-o nga kinaiya nga ginhatag sang Dios sa imo.

9. k) mahimuslan ang mga kahigayunan subong nga anak sang Dios.

Ang labing malahalón nga butang nga imo pagahimuon amo ang magpabilin nga naangot kay Kristo kag magtubo nga mabakud sa kabuhi nga iya ginhatag.

Magpabilin kamo sa akon, kag ako sa inyo . . . kay luwas sa akon wala kamo sing mahimo. Juan 15:4, 5.

Busa sa bagay nga ginbaton ninyo si Kristo Jesus nga Ginuo, maggawi kamo sa Iya, nga nakapanggamot kag natukod sa Iya kag napalig-on sa pagtuo, subong sang gintudlo sa inyo, nga nagabugana sa pagpasalamat. Mga Taga Colosas 2:6, 7.



### **Buhata Ini**

Butangi sang x ang husto nga sabat.

10. Ano ang labing malahalon nga butang nga imo himuon agud magmabakud ikaw nga Kristohanon?

..... a) magpabilin nga naangot kay Kristo.

..... b) magpaninguha nga mangin kaangay ni Kristo.

..... k) magsunod sa ginabuhat sang iban nga Kristohanon.

Sabat: 10. a) magpabilin nga naangot kay Kristo.

### **Ang Bag-o Mong Panimalay: Ang Imo Amay**

Ang Gamhanan nga Dios, nga nagtuga sang kalibutan, nangin mahigugmaon mo nga Amay. Indi paghunahunaa nga estrikto Sia kag yara sa malayo nga duog. Yara Sia sa imo luyo karon, nga handa sa pagbulig sa imo sa tanan mo nga gumontang.

Karon kay anak na ikaw sang Dios, buot Niya nga magpakighambal ikaw sa Iya subong nga imo Amay. Kag maghambal ikaw sing tampad kag may pagsalig, subong sang ginahimo sang isa ka bata nga nagapakighambal sa maalwan kag mabinatyagon niya nga amay. Magpakighambal ikaw sa Iya paagi sa pagpangamuyo sa adlaw-adlaw nga tanan, bisan sa ano nga oras. Isugid sa Iya ang tanan nimo nga mga gumontang. Pasa-lamati Sia sang Iya pagpakamaayo. Ginadumdom Niya ikaw kag ang tanan nga may kahilab-tanan sa imo.

Kon magpangamuyo ikaw, indi kinahanglan ang matahum nga mga pulong ukon nasaulo nga pangamuyo. Sugiri lang Sia kon ano ang yara sa imo tagipusoon.

### **Buhata Ini**

Butangi sang x ang tupad sang husto nga sabat.

11. Sa bag-o nimo nga kabuhi karon, ang Dios kaangay sang

..... a) malayo nga tinuga nga indi naton matawag.

..... b) mahigugmaon nga Amay.

12. Ano ang imo buhaton kon nagapangamuyo?

..... a) magsaulo sang palangadi-on kag sulitsuliton sa pagpangadi.

..... b) maghambal sing tampad sa Dios subong sang bata nga nagapakighambal sa iya amay.

..... k) maggamit sang mga pulong nga binalaybay.

Sabat: 11. b) mahigugmaon nga Amay.

12. b) maghambal sing tampad sa Dios subong sang bata nga nagapakighambal sa iya amay.

### **Ang Bag-o Mong Panimalay: Ang Imo Magulang**

Sa panimalay sang Dios, si Jesu-Kristo amo ang imo Magulang. Tungod sang daku Niya nga

gugma sa imo nagpakamatay Sia sa krus sa pagluwas sa imo. Gusto Niya karon nga mabuligan ikaw sa pagkabuhi nga malipayon kag magmangin madinalag-on batok sa sala. Pasalamatì Sia karon sa pagluwas Niya sa imo kag sa bulig nga Iya ginahatag sa imo adlaw-adlaw.

### **Buhata Ini**

Butangi sang x ang tupad sang husto nga sabat.

13. Sa sining bag-o mo nga kabuhi, si Kristo Jesus ang imo nga  
..... a) Manluluwas kag Magulang nga Utod.  
..... b) mapintas nga hukom.

Sabat: 13. a) Manluluwas kag Magulang nga Utod.

### **Ang Bag-o Mong Panimalay: Ang Balaan nga Espiritu Kabulig Mo**

Ang Balaan nga Espiritu, Ikatatlo nga Persona sang Trinidad, amo ang nagahatag sa imo sang makatilingala nga milagro sang pagkatawo liwat. Ginbag-o Niya ang imo makasasala nga kinaiya kag ginhimo ka nga anak sang Dios.

Magapakigsumpong pa ikaw sa daan nga ugali kon kaisa, apang ang Balaan nga Espiritu nga nagapuyo sa imo tagipusoon magabulig gid sa imo. Sa matinumanon kag matinuohon nimo nga pagbuylog sa Iya, pagatudloan Niya ikaw kon ano ang imo pagabuhaton. Kag hatagan Niya ikaw sing kusog sa paghimo sini.

**Buhata Ini**

Butangi sang x ang tupad sang husto nga sabat.

14. Nahanabo ang milagro sang pagkatawo liwat sa imo tungod sa  
..... a) Ebanghelista  
..... b) Pastor  
..... k) Balaan nga Espiritu
15. Yara ang Balaan nga Espiritu sa  
..... a) pagsilot sa imo kon makasala ikaw.  
..... b) pagpuyo sa imo kag magbulig sa imo sa paghimo sang mata-rung.
16. Mahimo nimo kon ano ang gusto sang Dios nga imo buhaton  
..... a) sa gilayon  
..... b) tungod kay ang Balaan nga Espiritu magapilit sa imo sa paghimo sini.  
..... k) kon matinuohon kag matinu-manon ikaw sa pagbuylog sa Balaan nga Espiritu.
17. Mahangpan nimo kon ano ang imo pagabuhaton kag masarangan mo sa pagbuhat ini paagi sa  
..... a) imo kaugalingon nga kaalam.  
..... b) imo kaugalingon nga gahum.  
..... k) bulig sang Balaan nga Espiritu

- Sabat: 14. k) Balaan nga Espiritu.  
15. b) pagpuyo sa imo kag magbulig sa imo sa paghimo sang matarung.  
16. k) kon matinuohon kag matinumanon ikaw sa pagbuylog sa Balaan nga Espiritu.  
17. k) bulig sang Balaan nga Espiritu.

### **Ang Bag-o Mong Panimalay: Iban nga mga Kristohanon**

Ang tagsa ka maminatud-on nga Kristohanon nga natawo liwat, isa ka anak sang Dios. Tungod kay ang Dios aton Amay, mag-uloludod kita kay Kristo.

Ang kautoran nga mga Kristohanon malipay nga kabuylog nila ikaw sa panimalay sang Dios. Himuon nila ang ila masarangan sa pagbulig sa imo sa espirituhanon nga pagtubo agud magmabaskog ikaw nga Kristohanon.

Kon may palaligban ikaw, indi magkahangawa sa pagsugilon sa pastor ukon sa iban nga kautoran sa iglesia. Magapangamuyo sila kag ila man himuon ang ila masarangan sa pagbulig sa imo.



### Buhata Ini

Butangi sang x sa tupad sang husto nga sabat.

18. Ang tanan nga mga maminatud-on nga Kristohanon nga natawo liwat
  - ..... a) mga utod nimo kay Kristo.
  - ..... b) katapo sang organisasyon.
  - ..... k) maayo nga abyan.
19. Karon sulati ang imo Rekord sang Bumolutho kag Palasinawan para sa Leksyon 1.  
Pagkatapos nga nabuhat mo ini, magpadayon ka sa masunod nga leksyon.

### PINASAHI NGA PAHIBALO

Mahimo mo na karon masulat ang mga sabat sa Palasinawan sang leksyon 1.

Kon nadula ang imo papel palasinawan magsulat gilayon agud mapadalhan ikaw sing bag-o.

Pagkatapos nga makompleto ining pinasahi nga palasinawan, mahimo ka makapadayon sa pagtuon sang madason nga leksyon.

## PAGPAKILALA sang LEKSYON 2

Natun-an mo na ang “Bag-o Mo nga Kabuhi” kay Kristo. Karon, ang ICI nagakalipay sa pagtanyag sa imo sang leksyon 2 nga ginatig-ulohan “NAGATUON IKAW SA PAGLAKAT”.

Sa sini nga tulong-an matun-an mo ang dugang pa nga mga paagi sa pagpuyo nga minuswagon sa espirituhanon nga kabuhi sang Kristohanon. Nagakahulogan ini sing labi pa sang sa paghibalo kon paano ang tawo nakalakat sa bulan. Ini nga leksyon magahatag sa imo sang ihibalo kon paano ikaw makalakat kaupod sa Dios. Matalupangdan mo man ang pila ka mga pagdaya ni Satanas kag kon paano mo malikawan ang pagkasandad. Matukiban mo ang mga sabbat sang Biblia sa madamo mo nga mga gumontang kag magabaton ka sang dugang pa nga kasigurohan sang imo kaluwasan.